

Lulio Wever di Funeraria Del Pueblo:

DIABIerna A DERA ULTIMO DEFUNTO DI GRAF DEN SANTANA DI PLAYA

ORANJESTAD (AAN): Loke tur hende, principalmente Funerarianan a spera di lo no pasa nunca, a sosode toch Diabierna atardi na Aruba, ora cu e ultimo defunto a ser dera den graf di santana Catolico na Oranjestad y asina e lugar a yena completamente. No tin graf mas pa dera hende!

Funeraria del Pueblo di Lulio Wever, ayeratardi a percura pa entiero di e ultimo defunto cu a haya un espacio liber pa graf. Awor no tin lugar mas.

Den un entrevista cu DIARIO, Lulio Wever a confirma lo susedido, indicando cu e mes ta canando tras di e problema aki pa bin solucion pa deramento den santana. "Mi tin 7 pa 8 aña caba buscando solucion pa e problema aki. E santana Catolico na Playa awor a yega e punto final, y ultimo lugar cu por a ser haya pa un defunto, a ser usa pa entiero Diabierna. Simplemente bisi, Santana di Playa ta chokvol," el a bisa.

Awor e problema ta cumenza! Esnan cu no tin famia cu tin kelder mester lubida, esta nan por worde dera den santana Catolico di Playa! Pues na Playa, solamente si bo tin famia cu tin kelder, bo por worde dera. Pero pa traha kelder of coba graf, esaki ta imposible, no por mas. E ta

COSTO DI BIDA SUBIENDO KETO BAY

ORANJESTAD (AAN): Segun calculacion di e Oficina Central di Estadistica den luna di November di 1992 ta muestra cu costo di bida a subi cu 0.4%. November 1992 e tabata 136.9 y na December 1992 a bira 137.4 (Basis december 1984 ta 100.0)

Riba e periodo di 30 November 1992/31 december 1992 a registra e siguiente cambianan di prijs den diferente sector: Cuminda + 0.5% Bebida y Cigaria + 0.1% Paña y Zapato + 1.1% Vivienda + 0.6% Muebla Cas + 0.7% Salubridad + 0.2% Transporte + 0.7% Otronan + 0.2%.

finito, segun Wever a declara.

Mientras tanto el a agrega cu tin hopi kelder tambe cu ta mal cuida, y cu e famianan no ta preocupa. Pero asina pone man na nan, doño ta core sali. El a admiti cu tin hopi kelder cu hendenan no sa mes na cual famia nan ta pertenece.

DIARIO a compronde cu e ultimo pida lugar cu tabata tin ultimamente, Pastoor a usa na traha kelder pero esakinan ya a yena. Hasta a bin cu e sugerencia pa dera e morto na un forma cu no ta cay na grado di famia, esta "zuid-noord", mientras cu mayoria di e defuntonan ta dera "oost-west".

Hopi pregunta ta reina actualmente, pa asina haya sa ken mester ta responsable pa e situacion cu a presenta awor. Wever ta kere si cu urgentemente e instancia of e Ministro concerni mester bay tira vista den santana Catolico di Playa, pa asina implementa un plan di accion urgente.

Mester agrega cu den santana di Playa, a keda un lugar chiquito parti pabao, y segun informe Pastoor lo bay traha e ultimo 9 kelder, y unavez nan yena, lo no tin lugar mas y lo por bien cera e santana.

Hopi publicacion tabata tin di e pro- y con- encuanto e Santana Central na Sabana Basora. Mirando cu santana di Playa a yena, lo ta necesario seguramente pa traha e Santana aki anto rapido!

Funerarianan ta pidiendo auxilio, no pa nan mes, sino pa pueblo cu net den oranan tristo ta haya nan confronta cu problema.

E pregunta grandi ta, kico lo pasa awor si un morto cay, y no tin lugar pa dera? Si nan no tin kelder, kico lo haci cu nan? Un otro distrito kizas por acepta pa dera e defunto, pero mayoria vez famia lo no acepta esaki. Ta comprensible, pasobra si bo a biba henter bo bida na Playa, kizas lo bo no kier pa bo

worde dera den otro distrito.

Segun Wever, si acaso ta problema tin cu Gobierno no kier traha Santana, pues duna Funeraria e tereno pa nan traha e Santana. Ta cuatro muraya y un porta e mester.

DIARIO a compronde cu Funeraria del Pueblo tambe tin e plan pa bin cu un santana netchi, cu bon mantencion, simplemente bisa un santana presentable unda bo yega, bo ta keda contento cu bo ser keru a ser dera eyden. Tambe mester traha un "plan total" tambe pa ponemento di kelder y cobamento di graf, esta cu esaki ta ser haci na orden, pues cu bo no mester cana meymey di graf y keldernan pa bo por yega na e ultimo lugar di descanso di o ser keru.

Lulio Wever a splica cu el a yega di cana hopi tras di Domeinbeheer y Kadaster pa haya tereno na Sabana Basora, pero e papelnan a keda pega.

Tabata tin plannan tambe pa a bin cu un santana patras di Capel Montecalvario na Tanki Leendert, caminda hasta a cumpra tereno, pero e plannan a "muri".

Den vecindario di Solito tin hopi tereno, kico ta problema cu no por bin cu un santana mas. E funerarianan ta puntra di con esun concerni no ta na altura di e situacionnan aki.

Un solucion rapido tambe ta pa permiti deramento Catolico den e "chiké" (santana di gobierno dilanti Topcar). Ta conoci cu iglesia Catolico no ta dera hende eyden, y por a compronde cu tin como 20 kelder, a yega momento cu eyden mester bay dera awor. Loke mester haci ta pa pastoor bendiciona esaki como santana catolico.

"E chiké a ser haci bunita tambe recientemente, y kizas si cos sigui asina, hende lo worde obliga pa bay dera Catoliconan eyden tambe," Wever a termina bisando.



PERCURA BO NO MURI!!